

# Elyone teruskan legasi Matin

KUALA LUMPUR - Bekas jaguh angkat berat kelahiran Sabah, Matin Guntali bukanlah nama asing dalam sukan tanah air setelah berjaya membawa pulang satu pingat perak dan empat gangsa sepanjang Sukan Komanwel yang disertainya suatu ketika dahulu.

Mana tumpahnya kuah kalau tidak ke nasi, kini giliran anaknya, Elyone Matin, 23, menggalas beban dan tanggungjawab sebagai atlet angkat berat wanita, sekali gus menyambung legasi keluarga untuk mengharumkan nama negara.

Meskipun tewas ketika beraksi pada Sukan SEA Indonesia 2011, nyata ia tidak pernah mematahkan semangatnya untuk terus berjuang, malah Elyone menjadikannya sebagai sumber inspirasi dalam memburu pingat emas pada Sukan Sea Myanmar nanti.

"Ini merupakan peluang kedua saya. Jadi saya akan buat yang terbaik dan telah bersedia dengan membuat latihan setiap hari. Saya yakin dapat membawa pulang sekurang-kurangnya pingat.

"Bukan terlalu yakin, tetapi saya tahu tahap kemampuan diri saya dan berdiri di atas kaki sendiri," ujar Elyone yang mendapat suntikan semangat luar biasa daripada jurulatih merangkap bapanya.

Tambah pelajar jurusan Komunikasi Universiti Putra Malaysia (UPM) itu, Elyone mengakui peranan bapanya dalam mendidik dan menurunkan ilmu angkat berat banyak mempengaruhi kehidupan sehari-hari.

"Bimbingan dan kasih sayang yang dicurahkan sangat membantu saya dalam menguruskan pelbagai hal."

"Malah, tunjuk ajar darinya juga memberikan saya semangat yang orang lain tidak dapat rasa," kata anak kelahiran Kota Kinabalu itu dengan memasang misi untuk mara ke kejohanan yang lebih tinggi.

Elyone bakal berentap pada Sukan SEA Myanmar bulan depan dalam kategori 63kg wanita dan berhasrat mahu memecahkan rekod peribadinya iaitu 81kg *snatch* dan 95kg *clean & jerk*.

## Sukan SEA

### Info

#### ANGKAT BERAT

**Pengurus:** Abdullah Awang

**Jurulatih:** Mohd. Faizal Baharom, Stefan Hristov Stefanov and Lin Xinhui

**Pegawai Pasukan:** Jailin Tololong

**Kontingen:** Mohammad Azril Huzairi Ramli, Mohd. Hafifi Mansor, Muhamad Aznil Bidin, Constantine Clement, Mohd. Faiz Musa,

Azizah Fadzil, Frenceay Titus, Elyone Matin, Nor Khasida Abdul Halim and Sharifah Inani Najwa (simpanan)

**Tarikh pertandingan:** 13-16 Disember 2013

**Tempat pertandingan:** Dewan Angkat Berat, Yangon

**Sasaran:** 1 Perak

**Rekod:** Sukan SEA 2009 Laos

(3 perak, 2 gangsa)

Sukan SEA 2011 Palembang (1 perak, 1 gangsa)

**Lelaki:** Muhamad Aznil Bidin (56kg), Constantine Clement (62kg), Mohammad Azril Huzairi Ramli (69kg), Mohd. Hafifi

Mansor (69kg) and Mohd. Faiz Musa (94kg)

**Wanita:** Azizah Fadzil (53kg), Sharifah Inani

Najwa (53kg), Frenceay Titus (58kg), Elyone

Matin (63kg) and Nor Khasida Abdul Halim (69kg)



MATIN Guntali memberi tunjuk ajar kepada anaknya, Elyone Matin yang bakal mewakili Malaysia pada Sukan SEA Myanmar bulan depan dalam latihan di Kompleks Sukan Desa Tasik, Kuala Lumpur baru-baru ini. - UTUSAN/HAFIZ JOHARI